

Ilinniagaqartut nunatsinneersut Danmarkimi najugaqartut nunatsinni Folketingimut qinigassanngortittunik qinersisinnaanerat aqutissiuunniarlugu Folketingimut qinersinermut inatsisaasup allanngortinnissaa pillugu saaffiginninnissaannik Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inuit Ataqtigiit Inatsisartuni gruppianni ilaasortat)

Aappassaaneerpeqarnera

Akissuteqaat

(Naalackersuisut Siulittaasuat)

Aallarniutigalugu Inatsisinut Ataatsimiititaliaq isummernissamut tunngavissiamik kiisalu siullermeerinninnermi Naalackersuisut oqaaseqaataannik peqqissaarussilluni sulisimaneranik Naalackersuisut sinnerlugit qujassuteqarfigissavara.

Inatsisinut Ataatsimiititaliap isumaliutissiissutaani atuarneqarsinnaavoq ataatsimiititaliap malugisimagaa Kalaallit Nunaanni folketingimut qinersisarneq pillugu Inatsisip § 3-iani atuuttumi inuit pineqartut Naalackersuisullu isumaliutigisaanni inuit pineqartut akornanni tamakkiisuunngitsumik ilaannakortumillu assigiittoqartoq. Tamanna tunngavigalugu ataatsimiititaliap malugisimavaa killiliinerup Naalackersuisunit akissuteqaatikkut siunnersuutigineqartup qanoq annertutigisumik Kalaallit Nunaanni folketingimut qinersisarneq pillugu inatsisip § 3-ani killiliineq atuuttoq taarsearniarneraa ilassuteqartinniarneraaluunniit erseqqissumik paasinangitsoq.

Ataatsimiititaliap oqaaseqaataanut tunngatillugu ilisimatitsissutigineqarsinnaavoq Naalackersuisut oqaaseqaataanni siunertarineqarmat kalaallit Danmarkimi Savalimmiuniluunniit najugaqarallartut Kalaallit Nunaanni Inatsisartunut, kommunalbestyrelsinut, Nunaqarfimmi Aqutisunuk ilagiillu sinniisaannik qinersisarnerni periarfissat assigalugit Kalaallit Nunaanni folketingimut qinigassanngortittunik allatulli qinersisinnaanissaat. Kisianni inuit piginnaatitaaffeqareersut killilersulernissaat siunertarineqanngilaq. Killiliinissaq Naalackersuisut saqqummiussaata kalaallit nunaanni folketingimut qinersinermi inatsimmi § 3-iani periarfissaareersunuk taarsiiniarnerunngilaq paarlattuanilli periarfissaareersunuk annertusaanerulluni.

Inatsisinut Ataatsimiititaliap isumaliutissiissutaani atuarneqarsinnaavortaaq ataatsimiititaliap maluginiarsimagaa innuttaasut naalagaaffeqatigiit immikkoortuini allaniikkallartut akornanni qinersisinnaasut amerlisinneqarsinnaanerannik Naalackersuisut isumaliutaat taamaallaat siunertarineqarmat. Taamaalillutik inuit innarluuteqarnertik Kalaallit Nunaanni katsorsarneqarsinnaanngitsumik nappaateqarnertik pissutigalugu aalajangersimasumik Danmarkimut nuussimasut isumaliutigineqartunut ilaasorinangillat.

Tassunga tunngatillugu ilisimatitsissutigineqassaaq Naalackersuisut saqqummiussaanni inuit pineqartut tassaammata Inatsisartunut, Kommunalbestyrelsinut, nunaqarfinni aqutisunut

ilagiillu sinniisaannut qinersisarnerni qinersisinnaatitaasut. Taamaattoq Naalackersuisut inuit pineqartut amerlileqqissinnaaneritut periarfissanik misissuinissamut piareersimapput.

Inatsisinut Ataatsimiititaliap isumaliutissiissutaani atuarneqarsinnaavortaaq ataatsimiititaliap maluginiarsimagaa sammisami malittarisassat atuuttut naalagaaffeqatigiit immikkoortuini tamani assigiikannersut, folketingimullu qinersisarneq pillugu inatsisit taakku pingasut ingerlaqatigiikannererisa attatiinnarneqarnissaannut soqutiginnittoqarnissaa ilimagineqarsinnaasoq.

Tassunga tunngatillugu oqaatigineqassaaq pineqartumut tunngatillugu inatsisinik nutaanik atulersitsiniarnermut atatillugu Danmarkimi Savalimmiunilu inatsisit eqqarsaatigalugit ataqatigiissaarisariaqarnissaq Naalackersuisunit eqqumaffigineqarmat.

Taamatut oqaaseqarlunga Inatsisartut siunnersuut pillugu suliarinninnissaat qilanaaraara.